

02 JAN 2003

Ling-Adun

MCA SEDIA DENGAR NASIHAT KOMPONEN BN ISU DUA ADUNNYA

KAMPAR, 2 Jan (Bernama) -- MCA sedia mendengar sebarang nasihat daripada parti-parti komponen Barisan Nasional (BN) berhubung kes dua Anggota Dewan Undangan Negeri (Adun) Pulau Pinang yang digantung keanggotaannya dalam parti itu tanpa had masa oleh Majlis Presiden MCA bulan lepas.

Presiden MCA, Datuk Seri Dr Ling Liong Sik berkata MCA berpendapat isu kedua-dua Adun itu telah diselesaikan mengikut perlembagaan parti dan tindakan telah diambil.

"Tapi jika kawan-kawan kita dalam BN hendak memberi nasihat, kita sedia mendengar," kata Dr Ling yang enggan mengulas lanjut mengenai nasib dua Adun itu yang akan dibincangkan oleh Dewan Tertinggi BN pada mesyuaratnya Selasa ini.

Menurut laporan akhbar hari ini yang memetik kenyataan Setiausaha Agung BN, Tan Sri Mohamed Rahmat, nasib Adun Datuk Keramat, Lim Boo Chang dan Tan Cheng Liang (Jawi) tentang sama ada perlu diisytiharkan sebagai Adun bebas atau kekal dalam BN akan ditentukan pada mesyuarat BN itu.

Kedua-dua Adun itu digantung keanggotaan mereka oleh MCA berikutan tindakan mereka berkecuali ketika pengundian usul DAP untuk menangguhkan Projek Lingkaran Luar Pulau Pinang (PORR) pada sidang DUN itu pada 21 Nov lepas.

Tindakan kedua-dua mereka menimbulkan kemarahan komponen BN yang lain, terutamanya Gerakan dan Umno yang mahukan kedua-dua mereka dipecat.

Sementara itu, Dr Ling berkata Perdana Menteri Datuk Seri Dr Mahathir Mohamad akan merasmikan upacara pecah tanah kampus induk Universiti Tunku Abdul Rahman (Utar) di sini pada 12 Jan.

Katanya, seramai 20,000 orang termasuk anggota parti dari seluruh negara, akan menghadiri upacara bersejarah itu.

Dr Ling berkata kos pembinaan dan konsep kampus itu akan diumumkan semasa upacara itu dan beliau menganggarkan ia mampu menampung 10,000 hingga 15,000 pelajar apabila siap kelak.

Katanya, Utar terbuka kepada semua kaum dan beliau berharap kerajaan akan memberi biasiswa kepada pelajar bumiputera untuk belajar di situ agar komposisi kaum seimbang.

-- BERNAMA

AR NMO